



SOzimus sanctis moribus & literarum scientia Anno post natum Christum sexcentesimo decimo, in Rhetia Vindelicorum magna diligentia Christum prædicauit, atq; homines sua prudentia in uera Christi religione instituit & confirmauit. Nam Atila Hunnus eam regionem planè de-fœdarat, atq; urbes cum templis euerterat. Fuerat is natione Græcus, atq; ob Dionisij Areopagita memoriam Dionisij cognomen adquisierat. Cum autem Francorum reges ad Christianam fidem conuersi, ea loca occupassent, omnia templa hinc inde restaurarunt, & pijs præsulibus exornarunt. Hinc factū ut sub Clotario secundo, qui Da-

gobertum antecessit, Zozimus ille primus Augustanus Episcopus ordinatus fuerit, eo nimirum tempore cum sub Eraclio Imperatore, impius Sergius cum Machomete suum uirus in Oriente effunderent. Itaq; Sozimus magna diligentia res eius Ecclesiæ ordinauit, atq; per annos octodecim rebus sacris ibidem præfuit. Hic moriens, successorem habuit Beruelfsum Sueuum, cum Sigibertus Dagoberti regis filius Australiam & Augustanam regionem gubernaret.